

欽定剿平粵匪方略

欽定剿平粵匪方略卷一百五十六 丙辰年

六月初一日

丙戌

湖北提督向榮西安將軍福興

前長蘆鹽運使彭玉雯奏言逆匪自攻陷溧水
後經臣向榮派張國樑帶兵馳往溧水會同明
安泰剿辦其時鎮江竄回大股之賊於太平神
策各門分股屯踞五月十五日先由龍脖子出
賊數千窺伺前敵各營並在大小水關一帶築

壘當派副將王浚等分路進攻將賊擊敗復有
上游賊衆二萬從蕪湖金柱關一帶陸續竄回
金陵屯踞北鄉與大水關之賊聯絡並於黃馬
羣路口添築二壘當飭張國樑抽帶兵勇趕回
大營一面札飭總兵虎嵩林遊擊張玉良等各
調兵勇均赴大營策應並密飭都司馮子材帶
廣勇五百名潛赴黃馬羣地方將該逆新壘焚

燬斬殺二百餘人十七日逆匪四五百人直撲
仙鶴門營盤王浚李定太李若珠等整隊迎勦
該逆復突出數千分股包抄我軍衆寡懸殊旋
戰旋退該匪卽乘勢攻撲將仙鶴門營盤圍困
臣復抽派兵勇交遊擊李鴻勳帶往援勦該逆
始行退去臣福興以賊勢過衆親往青馬羣地
方連夜趕修營盤堵其內竄詎該逆分十數股

來撲張國樑督率兵勇奮擊斃賊數百名忽紫
金山賊股撲犯山腳營盤南門及通濟門又出
賊數千直撲七橋壩捷勇營盤該勇存營不及
三百其勢甚危臣向榮親統官兵策應併力截
殺我兵無不以一當百斃賊甚多戰至午時張
國樑一軍火藥鉛彈俱盡該逆抵死不退張國
樑匹馬衝殺立砍黃衣賊首三人副都統德崇

額槍斃悍賊多名適另股四千人翻山圍撲
馬隊營盤縱火焚燒以致各營相繼失陷逆衆
數萬卽圍撲大營其時徧地皆賊我軍於賊隊
之中往來鏖戰斃賊不下數千人張國樑直衝
賊隊左腳被槍子打傷仍復拌命力戰參將陳
明志都司戴文英李振甲劉秀珠等均不知下
落兵勇傷亡亦不下千餘人該逆復分股至小

水關高橋門一帶查高橋門爲大營後路萬一
被賊占踞則我兵腹背受敵營盤旣失祇得將
全軍退至涇化鎮整隊扼守臣軍兵力本單今
因連日苦戰死傷不少必須整頓休息調集兵
力方可再圖進剿惟該逆人數旣衆久已垂涎
蘇常設再竄至句丹乘勢內犯則大局不堪設
想臣等以丹陽爲內竄要道情形喫重卽令拔

隊分起馳赴丹陽將城守一切布置設防並於
城外擇地趕築營盤俾資戰守一面將秣陵關
一軍調至溧陽歸總兵明安泰調遣併力防堵
以扼內犯之路並將石埠橋棲霞仙鶴門各軍
卽令總兵德安帶赴白土一帶防守句容原設
兵勇一千二百名今於丹陽抽撥勇壯一千五
百名前往協同防守以期保固東南大局惟臣

等日久無功今復將營盤失陷請

旨將臣等從重治罪以儆戎行奏入

上諭曰向榮久歷戎行素諳機宜雖賊多而悍何至如此大挫展布全無殊屬辜恩著奮勉以補前愆趁此梟獍萃集未必不轉好機會爾若豫存拏問發遣以遂脫離之心是真喪良也料爾或不出此

上命軍機大臣傳諭向榮福興余萬清德興阿翁同書

曰上下游援賊糾合金陵逆衆數萬於神策太平門
外屯踞圍撲我軍營盤因衆寡不敵以致失陷退保
丹陽此時賊勢猖獗已極向榮等遏其內犯固爲保
全大局起見尤應重整兵威力圖進剿藉以牽制賊
勢若僅株守丹陽一蹶不能復振則該逆愈無顧忌
況甯國溧水尙爲賊踞內犯之路不止一處更恐顧
此失彼該大臣等營壘已定務當奮力出剿以冀轉

敗爲功庶可稍贖前罪現在江南大兵已撤逆賊無所顧忌江北情形亦極喫重前調河南防勦之陝西綠營官兵一千名已諭令英桂調赴揚州交德興阿等相機布置如江北兵力足敷攻勦而江南尙在需兵再行調往向榮軍營其黑龍江餘丁五百名到揚後卽交德興阿等調遣向榮現駐丹陽距大江已在百里以外所有紅單各船恐難兼顧著德興阿翁同

書余萬清分飭上游各船攻剿觀音門一帶賊船下
游各船攻打瓜州金山等處以分賊勢使不得全力
內犯亦不敢分股北竄俟向榮統兵前進重整軍威
仍由南北聯絡再籌剿辦之方今當官兵新挫逆鱗
方張該大臣等務須同心協力謀勇兼施冀早挽回
大局以慰朕懷

上又命軍機大臣傳諭怡良趙德轍曰金陵大營相繼

失陷向榮收集各軍扼守丹陽蘇常情形萬分喫緊
怡良總督全省責無旁貸著卽妥籌布置仍遵照前
旨迅飭宜興荆溪各處地方文武嚴密防範並通飭
蘇常各屬查拏奸細毋令勾結貽患向榮軍營兵力
甚單趙德轍曾任江甯府知府熟悉金陵民情如能
將秣陵關溇化鎮一帶民團聯絡以輔兵力之不足
該署撫卽可出省爲向榮後路援應該民團果能奮

勇立功卽著奏請優獎著趙德轍酌度情形相機妥辦

上又命軍機大臣傳諭英桂曰向榮營盤被陷退扼丹陽蘇常情形甚爲喫重卽江北一帶亦恐遂匪生心北竄前諭英桂調赴金陵之陝西綠營兵一千名已據該撫奏籌給軍裝飭遊擊興貴等帶由永城前往現在向榮已移紮丹陽著英桂飛飭該遊擊將此項

官兵改赴揚州德興阿軍營聽候該大臣調撥其黑龍江馬隊餘丁五百名亦已諭令全數撥往揚州並著英桂迅卽飭令起程勿再延誤

上諭內閣曰此次逆匪糾衆圍撲向榮一軍雖因屢經抽撥兵力過單究屬調度乖方辜恩溺職湖北提督向榮著卽革職拔去花翎仍留欽差大臣督辦軍務西安將軍福興著革職留任拔去花翎仍幫同向榮

奮勉立功以贖前愆其不知下落各員弁並著查明具奏

初二日丁亥何桂清奏言五月初一日鄧紹良督

兵進攻甯國踞賊逆衆伏巢不出初二日總兵都隆阿移營板橋該逆出隊來撲兵勇迎勦殲擒多名初八日鄧紹良督飭侍衛胡鳳鳴等進攻該逆數千由大東門小東門撲出我軍分路

迎擊守備石玉龍等首先衝入賊隊立斬悍賊
數名賊勢頓挫我軍槍殺斃賊數百名該逆復
從南門撲出千餘人亦被我軍擊退斬俘無算
鄧紹良復與都隆阿分兵進紮夏家渡詎孫家
埠附近之水東鎮趙村等處奸民私立天罡會
名目聚衆從逆欲抄我軍之後都司銜申明照
率勇防守營盤俟其逼近擊斃賊匪三四百名

鄧紹良派胡鳳鳴等飛奔救援槍礮齊發轟斃
千餘名該逆潰竄申明照骸受箭傷猶鼓勇追
殺斃賊二三百名溺斃者數百名是日郡城之
賊分黨出竄欲圖接應都隆阿扼守板橋賊不
能越仍復回巢鄧紹良以奸民結會從逆法所
不容但經此次勦辦已足以壯軍威且各村鎮
究屬良民多而莠民少當經撰具告示曉以大

義並因孫家埠僅有申明照一軍亟應稍增兵力復令把總田俊帶楚黔勇三百名折回孫家埠協防十二日賊匪窺伺夏家渡營盤當經擊退十三日賊衆數千直撲同知徐慮善營盤守備楊國正首先迎敵適五里亭援兵趕到分投衝殺該逆紛紛潰奔我軍追至張公橋擊斃逆匪二百餘名落水死者二百餘名現仍飭督率

將士相機進勦早日克復郡城奏入報

初三日

戊子

德興阿翁同書奏言查浦口洲地之

賊近日頻出侵擾經安勇等帶勇進勦奪賊浮
橋二座縱火焚燒賊卡七處奪獲船隻礮械甚
多五月十九日復進攻江浦行至十里橋遇賊
數千我兵一面拒敵一面分兵前進斃賊無算

其九洲賊援經我兵截殺一百餘名該逆大
敗狂奔官軍乘勝追剿直薄江浦城下敗賊四
散奔逃掩殺四五百名生擒長髮老賊敖光越
陳有波二名二十三日富明阿等聚齊馬步各
隊先攻江浦北門外賊壘該逆突出與我兵刀
矛相錯兵勇拔椿越濠搶進放火焚其蓆棚該
逆拌死撲出被馬隊抄截追殺立將逆壘二座

毀平賊向東南奔竄計殺賊三百餘名臣等仍嚴飭各軍剋期攻克

同日宗人府府丞宋晉奏言金陵大營失陷向榮兵力不支情形危急現雖分路撥兵仍恐緩不濟事因念本年浙江所雇護送海運之火輪船轉動迅速礮械堅利水面攻勦較之紅單船尤爲猛迅現聞江浙海運米船均已到津火輪

船無所事事可否請

飭江督浙撫行令徑由圖山關入江焚攻金焦一帶賊
船風便數日可到先將瓜州攻克再由儀徵而
溯浦口力勦北岸賊匪與六合諸軍相爲犄角
則江甯鎮江對岸賊匪節節防我必不敢離巢
東竄是不特解江南之急卽江北亦愈就清謐
矣現聞有紅單船二十餘隻自粵來江德興阿

向榮有各爲分撥之說臣思兵力合則見厚分則見單應請

飭下德興阿向榮將紅單船併歸一處力扼蕪湖江面
乘夏令風熱之時盡力勦洗如能將蕪湖克復
則已俯賊之背甯國且不攻自退矣至現雇之
火輪船祇有二隻尙覺稍單似可多雇數隻較
爲得力惟駕駛控制必須才識兼優乃心國事

之人方能辦理無弊 臣聞浙江候補道繆梓甯
紹台道楊裕深歷次辦理海運於沙船商人情
形極爲熟悉又留浙道員金安清辦理茶局釐
務往來上海亦能洞悉外洋商情此三員皆才
識精敏遇事不辭勞怨可否請

旨飭下兩江督臣浙江撫臣將雇船事宜責成此三員
辦理均奏入

上命軍機大臣傳諭向榮德興阿怡良趙德轍何桂清
曰據宋晉奏江南情形危急請飭護送海運之火輪
船入江剿賊並紅單船一項請併歸一處力攻蕪湖
所奏不爲無見此項護送海運之火輪船前據向榮
等奏俟護運事竣飭調入江助剿現在護送海運業
已竣事火輪船入江之舉正在此時著怡良趙德轍
何桂清卽行飭知帶船各員迅由圖山關入江會同

紅單各船聽候向榮德興阿等調度又奏請再行多
雇輪船並責成道員繆梓楊裕深金安清辦理雇船
事宜等語輪船多雇既恐需費不貲又恐船大難於
駕駛前此洋人李泰國呈報有新製小火輪船之語
如能添購數隻較之大號輪船行駛更當便捷著怡
良等妥速會商如事屬可行須由內地官紳管帶應
需經費並著該督撫等妥爲籌畫迅速奏聞其繆梓

等三員能否前往上海甯波等處辦理船隻並著何桂清酌度具奏至紅單等船昨因向榮一軍距大江較遠諭令德興阿等就近調度本日據德興阿等奏攻擊金山情形似亦可牽制賊勢現在金陵既無大軍逆氛必更猖獗南北沿江處所在在堪虞如得火輪船協同紅單船上下游往來攻剿以挫兇鋒當可牽制賊衆使不敢深入紛竄該大臣等卽妥爲布置

以速爲貴至水師無陸兵相輔而行亦恐勢成孤立
向榮德興阿余萬清各營能否抽兵相助並著會商
妥辦

同日

上諭內閣曰前任福建按察使徐宗幹著馳驛前往安
徽幫同和春福濟辦理防剿事宜

初六日

辛卯

和春福濟奏言粵匪自江西下竄甯

國節經向榮分兵援勦金陵大營自形單薄德
興阿分救江浦等處力亦稍單此時若得一旅
之師出奇截擊使賊回救亦可牽制賊兵惟三
河爲廬州舒城廬江往來要衝該逆踞險死守
形勢無異瓜州臣和春督攻以來雖疊有斬擒
未能迅平賊壘此時裕溪運漕之間添賊萬餘
焦湖有賊船數百隻往來接應並搜搶漁船在

巢縣製造數千快槩卽不突至三河亦將窺伺
廬州兵力祇有此數實已防不勝防臣等連日
激勵官兵奮力偪攻斷不任其竄越奏入

上命軍機大臣傳諭和春福濟曰自向榮退守丹陽後
金陵一帶陸路無兵逆匪愈肆鷓鴣張和春等稱裕溪
運漕之閒添賊萬餘焦湖有賊船數百隻往來接應
又在巢縣製造數千快槩實屬防不勝防等語殊堪

詫異焦湖密邇廬州巢縣本有官兵攻剿何以任聽
該逆聚衆萬人在彼製造船隻且至數千之多一旦
駛下長江爲患不可勝言該提督等何竟不知思患
豫防著卽督飭員弁迅將逆船設法焚燬毋得養癰
貽患日後儘有快槳賊船駛至大江及由小口竄入
下游腹地者惟和春福濟是問徐宗幹於皖省情形
究未熟習和春等可酌量委辦事件

和春福濟又奏言 臣等查黑龍江馬隊先經分撥兩起赴巢縣防剿本年三月又派一起赴懷遠剿捕捻匪現三河軍營馬隊無多且因餉缺已久馬匹多不足額惟江南兵力單薄自應迅撥以資救援協領輯順所帶吉林五起馬隊二百餘名打仗勇敢素稱得力又遊擊景昌所帶步兵二百餘名於江面情形熟悉 臣等已札飭

聞

輯順等管帶馬步兵四百餘名迅速啟行前赴金陵協勦不准逗留奏入報

初八日癸巳向榮奏言查丹陽地方一走新豐至

丹徒鎮一走馬陵至甘棠橋一通植樹岡均係通鎮之路一由白兔一由句容均可直達金陵此外尙有小道可通金陵鎮江者實爲蘇杭緊

要門戶臣已飭總兵張國樑虎嵩林等連日於城內外布置設防凡扼要處所均已完築營盤日來軍心稍定辦理已有端倪惟句容地勢散漫必須多設兵力臣復於丹陽調撥兵勇二千名令副將西林馳往統率防堵其溧水之賊經總兵明安泰於十七日進攻頗有斬獲臣現飭令管帶兵勇馳赴溧陽會同署總兵江長貴將

溧陽金壇東壩內犯之路扼截仍相機進勦溧
水之賊其白兔寶堰地方亦爲內犯之路臣已
酌派兵勇前往駐紮並將寶堰船隻一律驅逐
不准停泊至石埠橋棲霞一軍經總兵德安於
五月十六七八等日出隊救援仙鶴門營盤與
候補副將巴圖督兵禦敵鏖戰三晝夜斃賊數
百因該逆愈來愈多我兵相持至十九日早衝

圍而出副將巴圖千總朱得隆奮勇殺賊力竭陣亡都司姚爵階身受多傷兵勇傷亡不少德安收集潰兵均已陸續來丹勉爲休息連日探得金陵逆衆分股徧近句容一帶焚掠兵勇新挫之餘誠恐難資守禦茲復派李志和統帶勇丁五百餘名馳往堵剿現在丹陽兵勇陸續到齊已令總兵張國樑總統諸軍挑選精銳汰除

疲弱並催調軍械以資戰守惟臣營兵勇原有一萬六七千自抵金陵以來分調各處不下萬餘存營不及五千現雖有福建漳泉兵勇三千名及歸德軍營陝甘兵一千名赴調前來而賊勢臨張官軍控衄加以轉戰頻年疲病傷亡亦復不少實屬不敷堵剿惟有仰懇

天恩飭廣東督撫挑選得力精兵四千名多配擡槍鳥

集賢堂卷之三十一
槍令提鎮大員統帶兼程前來助剿或由海船
前來更爲迅速至廣東陸路提臣崑壽總兵通
安參將梁顯揚衛佐邦聞皆久經戰陣熟悉賊
情並請

飭令酌派統兵前來更資臂助至前在金陵力戰陣亡
之廣東雷州營參將陳明志貴州古州鎮都司
李發榮永安協都司劉秀珠四川川北都司李

振甲候補副將巴圖廣西提標千總儘先守備
朱得隆並巴圖之子馬甲恩明隨營書識山東
棲霞縣份生郝聯蕙候補守備張德祿均請

勅部照應得升階加等議卹其餘陣亡兵弁暨不知下
落各員弁俟查明另行辦理

向榮又奏言據報逆匪千餘由土橋竄近句容
都司李譜等帶勇迎勦被賊包抄失利退至白

兔地方維時西林張汝琳玉興統軍尙在途中
逗留不進縣城被賊占踞臣當派守備梁克勳
把總李桂芳帶勇前往二十七日賊匪千餘人
直撲白兔營盤經李桂芳等帶隊迎剿鏖戰時
許李桂芳直衝賊隊手刃執旗賊目數名賊遂
不支我軍乘勢壓下賊衆奔潰追殺六七里斃
匪百餘名餘賊遠颺把總李桂芳屢立戰功此

次於官軍新挫之餘首先衝殺挫賊兇鋒仰懇
皇上天恩准將李桂芳以守備儘先補用並

賞換花翎以示鼓勵至帶兵逗留之四川懋功協副將
西林浙江處州遊擊張汝琳候補都司玉興與
遇賊卽潰之候補都司李譜均屬恇怯無能相
應請

旨將西林降爲守備張汝琳玉興李譜均請革職留營

責令立功贖罪奏入

上命軍機大臣傳諭向榮曰前調福建兵三千名已由邵武至撫州雖距江南較遠較之廣東兵到尙爲迅速著該大臣卽行催提以資攻勦至丹陽地方爲蘇杭緊要門戶我兵業已挖築營盤收集兵勇惟甯國溧水尙未克復而句容又被賊陷內犯之路幾不勝防該大臣於丹陽一帶布置旣定仍當激勵弁兵以

勦爲防毋得株守一隅以致鞭長莫及難資控馭

上又命軍機大臣傳諭葉名琛柏貴曰向榮所統兵勇前因抽撥過多值金陵各路梟獍紛集以致大營失陷該大臣退紮丹陽恐兵單不敷堵勦著葉名琛柏貴於廣東各標營中挑選得力精兵四千名多配擡槍鳥槍兼程前赴江南助勦如能由海道行走較之陸路更爲妥速著葉名琛等迅速商辦至統兵大員

向榮擬請飭令提督崑壽總兵通安及參將梁顯揚
衛佐邦等帶兵前往現在廣東各路漸次廓清能否
卽令該提鎮等前往丹陽之處並著葉名琛酌量調
派迅速奏聞

上諭內閣曰候補副將巴圖廣西提標儘先守備朱得
隆並巴圖之子馬甲恩明隨營書識山東棲霞縣份
生郝聯蕙廣東雷州營參將陳明志貴州古州鎮都

司李發榮永安協都司劉秀珠四川川北都司李振
甲及候補守備張德祿均係與賊血戰陣亡著一併
交部照該員等應得升階加等議卹

上又諭內閣曰逆匪由土橋竄近句容候補都司李譜
等迎勦失利副將西林等或逗留不前或遇賊潰敗
以致縣城被賊占踞副將西林著以守備降補遊擊
張汝琳都司玉興李譜均著革職留營以觀後效至

官軍退守白兔地方逆衆蟻擁來撲經把總李桂芳直衝賊隊手刃執旗賊目數名賊衆奔潰我兵追殺斃匪百餘名賊遂遠遁李桂芳著以守備儘先補用並賞換花翎

向榮又奏言據委員江西候補知府王曾樾等稟稱隨營糧臺總局設於大營之後其餘支應各省官兵分局亦俱設附近營盤之孝陵衛街

五月十八日該逆數萬分撲各營官兵迎勦被圍遂將衙街民房焚燬糧臺總局分局亦均被焚護臺壯勇僅五百人不能抵禦當卽潰散查月餉向多掛欠所到之銀隨收隨放局中並無存留惟有寄存代發上游紅單船之餉銀五千兩致被燬失又備支雜項錢文尙有五百餘千並存局中文冊鈐領攻城器具亦被燬失此外

尚有米局所收漕米千餘石亦被焚燒臣覈查
屬實現飭各員迅速清查辦理奏入

上諭內閣曰糧臺總局分局被焚並將米石燒燬該員
弁等救護不及實難辭咎所有辦理糧臺之前任鹽
運使彭玉雯及委員江西候補知府王曾樾均著交
部議處

向榮又奏言鎮江逆匪大股屯踞南門五峯口

及摩旗磨盤虎頭等山十五日余萬清令副將
站住督勇由丁卯橋銜枚前進先令奮勇勇丁
十數人偷近賊濠乘夜放火五峯口賊營火起
該逆正在撲救我軍衝入逆眾奔竄立將賊壘
踏毀後面兩營之賊見前營已破亦棄壘潰奔
各軍分路追剿斃賊無算時摩旗等山賊壘各
出接應官軍分隊截擊槍礮環施逆勢不支敗

聞

奔回壘是日計燬賊營三座傷斃賊匪五六百名奪獲槍礮旗幟刀矛百數十件臣已添派兵勇一千二百名前往扼紮丹徒鎮爲京峴山後路聲援奏入報

初十日乙未曾國藩文俊奏言前因江西軍務緊急

奏調廣東援師蒙

恩派重兵五六千人臣等亦屢次函咨迄今未接回文
每念贛州天險爲古來必爭之地非得廣東厚
援終恐不免疏虞道途久梗呼救無從顧懇

天恩飭下廣東督撫先撥一二千人星速踰嶺保守贛
州先據上游俟大隊全集再圖入援吉安不獨
江西之幸亦廣東之先著也奏入

上命軍機大臣傳諭葉名琛柏貴曰前因江西吉贛一

帶與本省道路梗阻屢經諭令葉名琛等調兵五六千名交提督崑壽統帶前赴贛州援勦嗣閱該督等奏報於未奉諭旨之先已派總兵壽山帶兵一千五百名從九品孫福同等帶勇一千八百名越境赴援本日據曾國藩文俊奏贛州道途久梗請飭廣東先撥兵勇一二千人星速踰嶺先據上游力保贛州再圖進援吉安自係未知粵省業已調兵此時江西南

路專待援於廣東必應如前降諭旨全數派往方資
得力惟現在江南情形萬分緊急昨諭該督等撥兵
四千名兼程赴援並酌量調派崑壽等統帶前往亦
屬刻不容緩恐粵省兵力不敷所有派援江西之兵
業經撥往三千餘名此外如尙未起程卽著暫緩先
將向榮所調四千名飭令速赴江南毋稍耽延此兩
路兵勇派出後如果粵省兵力尙敷調派仍著續行

調赴江西補足原調五六千名之數以期得力

曾國藩文俊又奏言臣等前派彭玉麟帶水師
四營駐紮吳城劉于瀆帶水師二營駐紮市汊
劉于瀆以豐城不復不能保全市汊四月初十
日督船直指豐城連日攻勦未能得手二十日
乘夜攻城牽制賊匪一面親督三板十號從西
岸暗渡派千總李逢春等督帶哨勇登岸各持

火器直撲南門外賊營登時火起賊卽退走我
勇隨後追趕復燒賊隄內營盤並將四門戰船
調齊轟擊賊疑陸軍已至不敢駐足悉往樟鎮
上竄計斃賊二三百人克復縣城又據彭玉麟
稟稱五月十三日賊船四十餘號擁上犯將
近望湖亭彭玉麟派兵分投迎截鏖戰逾時轟
斃賊匪數十名賊始敗退我軍乘勝追殺燒燬

賊船四隻查水師各營分駐要地均尙得力祇
以西岸數百里無一陸兵水軍不能獨樹功績
劉于瀆專用水師克復豐城額懇

天恩准臣等酌保數人以示鼓勵奏入

上諭曰賊先竄出焉得謂克復姑念其打仗奮勇著准
其酌保數人

曾國藩文俊又奏言都湖彭建之賊常有窺伺

饒州之意者齡兵勇僅二千餘人軍勢實形單薄臣等因派都司畢金科帶陸兵一千名都司金世蓮等帶水師千人前往饒郡聽候該道調度三月十七日賊合大股進犯十六都地方圍首陳鴻烈軍功趙德溶等率勇出隊斃賊五六十名該逆另股從後抄襲趙德溶力竭捐軀士卒傷亡四十餘人次日整隊復出用噴筒火彈

焚燬賊踞民房燃其火器局該逆蒼黃四竄我軍乘勝跟追傷斃賊黨五十餘名追偏落水死者百餘名奪船十餘號自此以後該逆退屯都昌之張家嶺鄱陽境內爲之一清該道相度地勢以章田渡響水灘十六都三處最爲緊要派撥陸勇水師分屯扼守令畢金科所統千人駐紮童子渡互相控制詎都昌湖口逆匪於五月

初六日直撲十六都團勇失利遂退至章田渡
東岸併力守禦初九日聞賊將自荻溪灘渡河
康國器等出隊河干禦之立將賊船擊沈湯家
嶺營內之勇乘勢過河追勦章田營勇繼之伏
賊突起我軍衆寡不敵仍回東岸惟前隊湯家
嶺營勇傷亡百餘人營盤陷失自此西路要隘
警水灘十六都章田渡三處均被該逆占踞十

五日該逆於章田渡搭造浮橋將撲童子渡營
畢金科率兵迎勦遇賊我兵開放槍礮轟斃騎
馬賊數名賊卽潰敗我兵追逼之際山後旋出
伏賊四五千入四面圍撲勢甚猖獗畢金科暨
哨長李興隆等奮力抵禦鏖戰逾時賊黨敗北
紛紛墜水共斃斃長髮賊六百餘人生擒二十
餘名查都司畢金科每戰身先士卒驍勇冠倫

此次獨當一面以少勝多相應籲懇

恩施給予獎勵其餘出力員弁兵勇等酌保數人
以勵戎行奏入

上諭內閣曰此次逆賊大股來犯都司畢金科帶兵堵
剿以少勝多洵屬奮勉出力著賞給呼爾察巴圖魯
名號以示鼓勵其餘出力員弁兵勇著會國藩文俊
酌量保奏

曾國藩文俊又奏言四月十一日建昌援撫之賊盤踞油墩等處李元度派兵馳往截擊十四日賊傾巢撲犯左右二營分黨千餘排立隄上接應李元度等分路抄擊殺斃二百餘名周鳳山等截擊西南兩門及隄上隄下之賊均有斬獲二十二二十五等日撲我中營之賊均被官兵設伏抄截斃賊無算我軍亦有傷亡二十六

日璫臨援賊三千屯紮西津渡對岸距北門五里當派兵前往防勦城內賊見我軍出隊離城來撲李進發身先陷陣殺賊數名受傷力戰直抵城下復斃賊多名李元度見西北城空虛督兵進攻胡蓋南等復分路鏖戰賊遂敗奔二十八日賊由北門分二股繞出對岸援賊亦乘勢渡河其時耿光宣堵住上游賊不得渡彭斯舉

等包抄賊後奮力衝殺約斃三百餘名餘賊折
回河干復被張應龍等追逼溺水對岸之賊移
船接渡經我軍擊沈賊船十餘隻斃賊四五百
人二十九日我軍沿河奪獲賊船十餘隻焚燬
三隻並沈其偷渡之船三十日過河搜勦援賊
追逐七八里將河岸賊壘三座盡行焚燒奪獲
帳房刀矛多件船四十餘隻子藥十餘石五月

初一日探知崇宜交界之棠埠地方及相距十里之秋下地方均有賊盤踞初二日派兵往勦城內之賊傾巢出撲我軍力戰賊匪死傷甚多終不肯退我軍乘虛奪城賊乃退回城上百礮齊轟我軍受傷二十餘人賊之傷斃者亦以百計初五日賊復以全力撲我中營我軍轟斃執大旗四賊追至隄上復斃賊二百餘名又崇宜

援賊復踞棠埠搭橋至秋下嘯聚幾二千人我軍往擊行抵秋下兩旁伏賊抄出遂致小挫初七初八初九等日賊屢撲我中營均經擊退初十日秋下援賊二千人糾合城內之賊大舉來撲各分三路圍攻彭大壽大呼過渡唐得升等從港之上下游分途圍殺連斃兇悍賊目十餘人賊始奔潰彭斯舉等過港衝殺賊屍徧野計

殺賊五六百名轟斃三四百名生擒七名查李
元度周鳳山督帶楚軍鄧輔綸林源恩督帶江
軍進勦撫州大小二十餘戰疊獲大勝祇以該
逆倚恃堅城上排大礮瑞臨援賊源源不斷以
致郡城未能遽復臣等惟有時加激勵誓復此
城以挽大局

曾國藩文俊又奏言建昌府城於二月二十九

日失陷該知府何棾會同丁憂在籍知府張家駒等招勇一千名與遊擊名謙分帶於三月二十八日收復新城縣復增募勇一千八百餘名督帶進剿四月十五十八十九二十等日疊次打仗俱有斬獲二十七日城內之賊由東南關各出千餘人分撲廟嶺地方名謙等分隊抵禦殲賊數十名並殲斃執大旗賊目賊隊自亂我

軍蠶擁而前該逆敗竄入城統計斃賊四百餘人五月初五日廉兆綸派廩生郭守謙帶廣信義勇一千二百名何栻等派教諭袁英帶南豐勇五百人均赴建郡約會各營分路進攻初六日偪城而陣以槍礮仰攻斃賊甚多初七日忽聞西路有宜黃援賊千人將至守備楊錦斌等馳往迎擊該逆不虞官兵猝至棄械而奔我軍

追殺一百餘人餘賊奔踞山巔我軍收隊賊忽
下山追逐武生張榮燮扼住山口楊錦斌回軍
合擊殺賊三十餘名生擒五人賊遂竄逸臣等
以撫建脣齒相依能破建昌則撫賊之右臂已
斷何栻張家駒等當無兵無餉之秋尙能招集
義旅自成一軍若非由省城另派兵勇助之一
旦挫敗則更無出而任事之人於是商定派楚

聞

軍黃虎臣等二千三百人益以九江賴標兵勇
千餘共三千五百人於五月十二日行抵建昌
卽派張家駒總理營務處與何栻會辦建昌防
剿事件臣等嚴飭該員等激勵士卒晝夜環攻
務期力復堅城肅清東路奏入均報

十五日

庚子

何桂清奏言向榮退守丹陽將士有

所統帥人心有所維繫蘇常一帶安堵如常惟
新挫之餘門戶卽能保固進取實未易言浙省
前已派撥兵勇千名馳往金陵此外無可再調
至漳泉兵勇三千名探聞僅有九百人已入江
境餘尙不知消息蓋閩省久形疲敝行裝軍實
籌措爲難卽使剋日到防而遠勞之師又非久
經戰陣軍氣難期振作現在大營精兵健將遠

不如前僅恃一張國樑四路奔馳安能兼顧且聞向榮日夜辛勞舊疾時常舉發而襄辦軍務者並無多人臣尤爲之焦慮查前此營中將領如和春秦定三傅振邦鄭魁士等均先後派赴廬州徐州等處上年廬州克復皖北賊勢已窮且聞捻匪漸就肅清能否移緩就急臣原未敢冒昧瀆請第聞該處兵多餉絀日有裁遣不如

分軍南渡會勦逆氛和春老成持重素得軍心
前在廣西軍營已能與向榮和衷共事況本係
江南提督大員營伍更資整飭若令幫同向榮
分路籌勦定易奏功而蘇浙財賦重地更不致
有意外之虞

何桂清又奏言據臬司慶廉稟稱接同知何孫
懋探報有大股賊匪從博望而來由毛公鋪竄

至定埠該處在東壩之東南十餘里已是建平
地界又准江長貴知會溧水賊目調齊各路股
匪欲圖直撲廣德該司以逆匪果竄建廣則抄
過甯國大營之後當卽飛咨鄧紹良迅撥勁旅
由建平廣德一帶迎頭截勦一面飛飭調防溧
陽之千總陶寶登一軍星夜折回堵守五月初
二日復探得定埠之賊竄至下壩已在東壩後

面副將秦如虎東壩一軍孤立無援商同仲孫
懋拔營馳赴建平以固浙省門戶甫抵建平北
門外二十里已有賊蹤臣查逆勢窺伺建平情
形殊爲喫重現飛咨鄧紹良暨檄行慶廉秦如
虎等督飭將士竭力堵剿

何桂清又奏言五月十五日新河莊有賊船游
駛欲圖援應甯國之賊而沈村獨當其衝鄧紹

良派守備張宏得等帶勇前赴該處紮營十七
日鄧紹良令都司周萬遠等於西路設伏自率
參將蕭知音等由北門前進分路齊攻逆黨出
西北兩門抗拒我軍奮力衝殺周萬遠等伏兵
齊起斃賊無算都隆阿等於南門外填濠以火
罐噴筒拋入城內燒斃逆黨甚衆該逆分股千
餘人出城攻撲我軍分投迎勦守備張應超等

復從旁抄襲殲斃悍賊多名餘匪潰敗入城查
點兵勇傷亡二十餘人十九日鄧紹良飭令千
總會得勝等移紮北門大街守備陳再受等扼
紮北門乾明寺都司陳國柱等於東北壩口合
紮一營該逆分黨二三千人直衝西門而出抄
至北門鄧紹良親督大隊迎擊石玉龍首先殺
入賊隊立斬黃衣騎馬賊目一名陳再受等跟

蹤撲進俘斬桀賊二十餘名殲斃賊黨一百餘
名是日都隆阿督隊攻小東門守備楊國正與
周天受合隊攻南門自卯至午我軍以槍礮轟
擊逆衆出城抗拒被我軍擊斃甚衆餘黨奔潰
回巢各營兵勇亦有傷亡鄧紹良以西門一路
空虛飭千總吳再升等移營於北門山梁兼顧
西路二十日營壘未成西門突出悍賊二千餘

名前來攻撲鄧紹良飛令蕭知音等分左右兩路抄襲自督周萬遠等攻打中路排槍轟擊前隊之賊紛紛倒斃而逆黨愈來愈多蕭知音等兩路截殺又斃悍賊數十名賊遂敗退查周天受全軍進紮南門而西北兩路復經鄧紹良於紅林橋孫家壩各路調派勁旅扼紮新營聲勢聯絡統計圍城兵勇已有萬餘人從此四面環

攻定可得手奏八

上命軍機大臣傳諭何桂清曰現在向榮退保丹陽兵力固甚單薄而往來布置尙有福興張國樑諸人和春督兵廬州該處被陷州縣未復者尙屬不少勢難遽離皖省惟向榮兵單可慮已諭英桂酌撥精兵前往丹陽助勦矣據奏甯國連獲大勝現已進逼城垣如能將甯郡趕緊克復則句容溧水不難次第奏功

現在賊犯建平浙省固屬喫緊而東壩爲蘇常門戶
未可遽撤防兵著與向榮會商布置未可顧此失彼
墮逆賊聲東擊西之計廣德建平距丹陽較遠卽著
何桂清統籌防勦毋令賊蹤內竄

上

又命軍機大臣傳諭向榮曰何桂清奏逆匪窺伺建
平秦如虎東壩一軍已馳赴該處以固浙省門戶惟
定埠之賊竄至下壩已在東壩後面秦如虎旣與浙

江委員仲孫懋拔營往援建平而東壩爲蘇常門戶
現在何人往守向榮近在丹陽必當兼顧不可稍有
疏虞丹陽大營布置既定向榮仍應督飭張國樑等
相機進剿戰守兼籌斷不可因大軍新挫專以株守
爲事至前調陝西綠營官兵一千名已馳赴揚州該
大臣卽咨商德興阿派令迅速渡江協剿其前調閩
廣各兵一時未能卽到已諭令英桂將該營西安馬

隊一千名酌量抽撥並另選得力官兵一二千名由揚州取道前赴丹陽交向榮調遣該大臣卽飛咨德興阿等一俟河南撥兵過境務卽催令渡江以資攻剿

上又命軍機大臣傳諭英桂曰西安馬隊官兵一千名前經調往剿捻現在捻勢漸衰而向榮軍營存兵甚少自當先其所急著英桂酌量情形或將西安馬隊

一千名全行調赴揚州再由揚取道前往丹陽或因馬隊得力未能卽行全數撥出亦著分撥若干另抽得力步兵一二千名飭令迅由揚州取道前赴丹陽俾向榮兵力稍厚得保江浙完善之區此乃當今急務該撫務當竭力籌畫以顧大局